

## 軍事

防守長江策 錄乙巳正月三十日時報

長江天塹。上溯武漢。下逮淞口。緝轂鄂贛皖蘇四省之地。實爲今日中國欲圖富強第一可用之區。而列強競爭貿易場之中心點也。各國兵艦。往來游弋長江上下。名則保護商務。實則各爲均勢之謀。懼落人後耳。近者江鄂兩督。頗留心長江防務。若張香帥訂購日本礮船。雷艇。並擬添備行駛淺水小輪。以爲巡江之用。周玉帥擬實力整頓江陰吳淞礮臺。合兩事而參觀。不可謂非兩公之關心時局。爲吾揚子江流域造幸福也。然而事機之來。稍縱卽逝。雖有大力。莫之能挽。方事機之未動。雖竭數十百志士之力。無補於時艱。迨其機既來。卽一二書生之言。或傾動當道。記者於兩公整頓江防之事。竊幸其事機之已動矣。而有不能已於言者一二事。竊願爲兩公效涓滴之助焉。

其一。謂江南提督不合駐松江也。溯提臣駐紮松江之意。殆鑒前明之事。爲防倭而設耳。明時倭人擾浙西者。大率由乍浦進口。蔓延於嘉湖蘇松之地。故本朝駐提臣於松江。以爲備禦。仍於乍浦設滿洲都統。然江海之形。今昔互異。乍浦海口。久爲沙漲。與川沙南匯鐵板沙

無異。輪舟板舫。從無一至其地者。故在今日置都統於乍浦。已成贅旒。置提臣於松江。尤爲閒著。審時度勢。謂宜移江南提督。駐守寶山。寶山距滬口不及十里昔宋臣李忠定有言。要害之地。必選大將屯重兵以臨之。蓋要害大將重兵三者相爲表裏。缺一不可。而吳淞形勢。則左環長江。右帶黃浦。外國洋舶之所從入。入其左則由長江上溯。以扼江陰。凌鎮江。犯江甯安慶。馳騫乎九江漢口。游弋乎荊州岳州。可以截江湖之漕。可以斷南北之道。天下形勢。皆爲搖動。入其右則由黃浦江以鬻聚乎上海。縱橫乎蘇松常鎮。大浸淫乎浙省之杭嘉湖。東南財賦之區。皆爲所潰敗。是吳淞一口實關係數省之安危矣。然或謂吾國兵力單弱。器械不精。卽移提臣駐紮淞口。又安能拒各國鐵甲兵艦之闖入乎。不知兵家者言。毋恃敵之不來。恃我有以待之。卽不能拒。必求其能拒。而後始可非因其不能拒而遂不拒之也。且卽不能拒。而敵艦之出入。亦可稽查敵勢之強弱。亦可以籌機援應之道。以視伏守松江。勢成坐井。其得失之數。不待著龜矣。且淞口若重設礮臺。費資應不下數十萬。當此庫款奇絀。強敵在門之日。而糜巨金。修防禦。不選大將屯重兵以臨之。亦何以解於李忠定公要害大將重兵三者相爲表裏之說乎。又或謂松屬鹽梟幫匪。伏莽堪虞。若無提督坐鎮其間。恐內亂不時竊發。則應之曰。寶山去松江不過一日程。卽有匪徒煽亂。不難馳往撲滅。況松屬所有防營。仍以

駐守亦何憂匪徒之不靖乎。故愚意就今日時勢而論。提臣駐於松江。不如駐於寶山之爲得計也。

其二謂狼福二鎮宜相機遷調也。按狼福二山雖夾江設鎮。而實無險可守。兩鎮相距。江面遼闊。自武漢而下。以至吳淞出口之江面。無寬於此者。礮臺雖有巨礮。其力亦不能射中敵艦。中流浩渺。鐵甲輪舟。儘可從容泝流而上。且二鎮建設之始。亦非爲防守長江門戶計也。查狼山設鎮。亦起於防備倭寇。明時倭人入寇。每由通州登陸。肆掠於裏下河州縣。又呂四堀港等場。爲鹽梟出沒之所。故設鎮狼山。一防倭人登陸。一爲彈壓鹽梟。福山則自道光二十一年海氛不靖。始分崇明鎮奇營之兵。設鎮福山。以防敵船入江。由福山以趨蘇州。是狼福二鎮建設之本意也。且狼福去吳淞二三百里。若敵艦從黃浦駛入。取道蘇州。以出鎮江。則已拊狼福之背。而出於其上。二鎮雖有重兵。亦安所用之。譬如人家守舍。不守大門。而守東西旁舍。今淞口爲長江之大門。而狼福則東西旁舍。吳淞不守。而狼福隨之矣。以有用之兵。置無用之地。計無有左於此者。謂宜移狼山鎮以守川沙。或南漚。以增淞口兵力。添兵以鎮崇明。以與寶山川沙南漚互爲犄角。則江海交匯之地。有一提二鎮。成三方鼎峙之形。不獨爲江防計。有磐石之固。卽爲江蘇計。亦收指臂之效矣。福山一鎮。卽不遷鎮。留以爲江陰

通州之揜援。然亦宜極力整頓。使一兵得一兵之用。此外則若江陰之鵝鼻嘴大小石灣礮臺。與對岸靖江之瀏沙礮臺相對。江面不過四五里。又如丹徒之圖山礮臺。與對岸之三江營礮臺。江心有沙洲阻塞。江面亦不過三四里。尤爲窄狹。是皆長江天然之險。誠能得其人。以爲守。則江甯以上。不足患也。況張香帥近且訂購日本礮船雷艇。以實力擴充水師。江督周玉帥近又擬奏添練陸軍二十營。歸長江水師提督程軍門統帶。卽駐太平。如此則上下游水陸兵驟增實力。聯絡一氣。進可以戰。退可以守。無事則鎮服內亂而有餘。卽有事亦可與外人抵制。不至再蹈開門揖盜束手坐斃之覆轍矣。故愚意移提督駐寶山。移狼山鎮駐川沙。南漚實於今日江防大勢合全局。而統籌非沾沾焉爲保守一隅計也。昔鄧艾由陰平入成都。而姜維劍閣之兵。不戰自下。堂奧旣窺。何有門戶。若敵師之來。淞口不守。則如吾前說。入其左則馳驚乎長江。入其右則凌犯乎蘇杭。而長江層層防守。盡成虛設矣。或謂移駐提鎮。事體重大。可坐言未易起行也。不知應變之道。與時會通。若謂茲事體大。則今日江淮不且增設巡撫乎。況今日練兵籌款。內政外交之事。何一非與時變通乎。此轉移之事。不過易無用爲有用。化閒著爲要著耳。若淞口增屯重兵一事。其兵與餉當由鄂贛皖蘇四省共認之。則亦輕而易舉。時機所迫。稍縱卽逝。後雖悔之。無可及已。語云。狂夫之言。智

者擇焉。竊願我留心時局之江鄂兩督。幸一統籌全局也。

論議興海軍事 節錄乙巳二月初五日新聞報

昔之戰重在陸。今之戰重在海。蓋自五洲大通。一切通商互市。略地殖民。無不擴張海權。藉海軍為立國之本。故其國海軍不振者。其國勢亦必不振。西班牙之失。菲律賓之失。非律賓之失。旅順其明驗矣。我國自甲午戰敗。艦隊損失。而醇王所創之海軍衙門。又復焚毀無遺。沿至今日。我之海權。非惟不能力守近藩。且又不能慎固戶闕。國權墮落。職是之由。倫貝子回國。發議重興海軍。議格不行。今試約而計之。一鐵艦之費。價十餘兆。一要隘守臺。費萬萬金。此外火槍大礮。一切應需之費。數亦不資。英法等國。國債負至千兆鎊。而核其所用之項。興工而外。大半以之治軍。我國國財消乏。已至極點。甯有碩大之款項。以治海軍乎。其難一也。列強艦隊。莫不有根據之地。以為能戰能守之長策。而吾國沿海形勝。樞紐盡弛。自旅大界俄。日近為人威海界英。膠灣界德。而南北洋之屏翰。失臺灣界日。廣灣界法。九龍界英。而南洋之藩籬。據所撤吳淞長江關為商埠。其險亦與敵共。值此門戶洞開之勢。從前所謂扼威旅以衛津沽。扼臺澎以防浙閩。扼廣灣以固東粵者。用之今日。千說皆廢。設使練成海軍。將以何處為根據地乎。其難二也。東西兵制。海軍特設專部。其行師權限。足以節制陸路。與中國水師管轄總督者絕異

軍事

一百七

乙巳